

## 每週經課朗誦經文(巴克禮台語漢字)2014/06/22

### 共同經課 - 1

#### 創世記二十一章八節~二十一節

8 囡仔漸漸大，就斷奶。以撒斷奶的日，亞伯拉罕排設大筵席。9 當時，埃及人夏甲給亞伯拉罕所生的子啲冷笑，互撒拉看見，10 就對亞伯拉罕講：「著趕出此個女婢及伊的子！因為女婢的子袂通及我的子以撒同做後嗣。」11 亞伯拉罕因為伊的子的緣故不止憂悶。12 上帝給亞伯拉罕講：「你唔通為著此個囡仔以及你的女婢憂悶。見若撒拉對你講的，你攏著聽；因為對以撒生的，才欲稱做你的後裔。13 論到女婢的子，我亦欲互伊成做一國，因為伊亦是生者。」14 亞伯拉罕早早起來，提餅及一皮袋的水，互夏甲，下佇伊的肩頭頂，連囡仔續教伊去，伊就去。到別是巴的曠野就行無路。15 皮袋內的水用了，夏甲就將囡仔放佇細欖樹腳，16 本身行開約略擲一支箭的遠，相對面啲坐，講：「我不忍看囡仔死」，就相對面坐，出聲大啼哭。17 上帝聽見囡仔的聲；上帝的使者對天裡叫夏甲講：「夏甲，你有甚麼代誌？唔免驚，上帝已經聽見囡仔佇遐的聲。18 起來！亦互囡仔起來牽佇你的手，我欲互伊成做大國。」19 上帝開伊的目矚，伊就看見水井，就將皮袋去入水到滿滿，續互囡仔飲。20 上帝及囡仔佇啲，伊就漸漸大，蹠佇曠野，成做射箭的人。21 伊倚起佇巴蘭的曠野；伊的老母對埃及地給伊娶一個某。

### 共同經課 - 2

#### 詩篇八十六篇一節~十節，十六節~十七節

1 [大衛的祈禱。] 耶和華啊，求你俯耳孔聽我，因為我是困苦喪鄉的。2 求你保存我的生命，因為我是虔誠的人。我的上帝啊，你的奴僕倚靠你，求你拯救我！3 主啊，求你憐憫我，因為我通日求叫你。4 主啊，求你互你的奴僕心歡喜，因為我用我的心仰望你。5 主啊，因為你是好，歡喜赦免人，有豐盛的慈愛賞賜凡若求叫你的人。6 耶和華啊，求你俯耳孔聽我的祈禱，俯落聽我懇求的聲。7 佇我患難的日欲求叫你，你欲應我。8 主啊，諸個上帝的中間無一個會比得你；你的所做亦無通比並。9 主啊，你所造的萬邦攏欲來仆拜佇你的面前；in亦欲榮光你的名。10 因為你做大，閣行奇妙的事；只有你是上帝。16 求你越過來看我，可憐我，將你的氣力賞賜你的奴僕，救你的女婢的子。17 求你顯出恩典我的憑據，互怨恨我的人看見來見講，因為耶和華——你幫助我，安慰我。

#### or 詩篇十七篇

1 [大衛的祈禱] 耶和華啊，求你聽公義，留心聽我的求叫！我的祈禱唔是對奸詐的嘴唇出，求你俯耳孔來聽！2 願我的判詞對你的面前發出；願你的目矚鑑察正直。3 你已經試驗我的心；你佇暝時鑑察我；你鍛煉我，無尋著甚麼；我立志互我的嘴無有過失。4 論到人的行做，我趁你所講的話家己謹守，無行強惡人的路。5 我的腳定定行你的路；我的腳未曾踏趨。6 上帝啊，論到我，我曾求叫你，因為你欲應我；求你俯耳孔，聽我的話。7 求你顯明你各樣的仁慈；你是用正手救倚靠你的人脫離許個起來攻擊in者。8 求你保護我，親像保護目矚仁；將我蓋密佇你的翅下，9 互我脫離許個搶劫我的歹人，就是圍困我欲害我生命的對敵。10 in互家己的油包密；in的嘴講驕傲的話。11 in現在圍困阮的腳步；in注目，欲掉倒阮佇地裡。12 in親像獅數想欲咬物，閣親像猛的獅子肫匿佇暗密的所在。13 耶和華啊，求你起來，抵當對敵，將伊打倒！用你的刀救我的生命脫離歹人。14 耶和華啊，用你的手救我脫離世間人，脫離許個佇今生有福份的世間人！你將你的財寶充滿in的腹肚；in有子兒到心滿意足，將其餘的財物留互in的嬰仔。15 論到我，我欲佇義的中間看見你的面；我睏醒的時，看見你的形容就心滿意足。

### 共同經課 - 3

#### 羅馬書六章一節~十一節

1 總無長長惦佇罪惡、互恩典加添多多嗎？2 斷斷唔通！咱向罪彼面已經死的，豈欲猶原佇罪中來活嗎？3 豈唔知咱見若曾受洗禮來入佇基督耶穌的，是受洗禮來入伊的死。4 所以，咱既然對洗禮來入佇死，及伊同埋葬，是親像基督對父的榮光對死人中復活，也欲互咱按呢行佇活命的新款。5 因為咱若聯合佇伊死的款式，也欲聯合佇伊復活的款式；6 是知咱舊的人及伊同釘，互罪的體會廢去，致到咱無閣做罪惡的奴才；7 因為已經死的是得著稱做義，來脫離罪。8 今咱信若及基督同死，就欲及伊同活。9 知基督已經對死人中復活無閣死，死無閣管轄伊。10 因為伊的死，是向罪做一擺死；伊的活是向上帝來活。11 按呢，恁惦佇基督耶穌著看家己向罪是死，向上帝是活。

### 共同經課 - 4

#### 馬太福音十章二十四節~三十九節

24 學生袂搬(pôa<sup>n</sup>)過先生；奴僕袂搬(pôa<sup>n</sup>)過主人。25 學生親像先生，奴僕親像主人，就夠額。人既然叫家主做別西卜，何況叫伊家內的人？」26 「所以，莫得驚in；因為無有蓋密後來無露出的事，亦無有隱密後來無互人知的。27 我佇暗中給恁講的，恁著佇光明的所在講出；俯佇耳孔給恁講的，著佇厝頂傳伊。28 許個害死身軀、袂害死靈魂的，莫得驚in；獨獨彼個會滅靈魂及身軀佇地獄的，卡著驚。29 二隻雀鳥仔豈唔是賣一分銀嗎？若唔是恁的父有准，一隻亦袂磕落地；30 就恁的頭毛亦攏過算。31 所以，恁莫得驚，恁比多多雀鳥仔卡貴氣！」32 「所以見若佇人的面前認我的，我亦佇我佇天裡的父的面前欲認伊；33 見若佇人的面前唔認我的，我亦佇我佇天裡的父的面前欲唔認伊。」34 「莫得拍算我來是欲互地上和平；我來唔是欲互伊和平，就是穴落刀劍。35 因為我來是互子及伊的老父絕情，查某子及伊的老母，媳婦及伊的乾家，亦欲按呢。36 閣人的對敵就是伊家己家內的人。37 「疼父母卡過頭佇疼我的，袂堪得佇我；疼子查某子卡過頭佇疼我的，袂堪得佇我；38 唔背家己的十字架來隨佇我的後面的，亦袂堪得佇我。39 得著伊的生命的人，欲失落伊；為著我失落伊的生命的人，欲得著伊。」